

四庫全書

集部

欽定四庫全書

集部
宋元詩會卷四
三

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄進士_臣沙重翰

欽定四庫全書

宋元詩會卷三

兵部主事陳焯編

張詠

字復之濮州鄆城人太平興國五年郡舉進士議
以詠首薦有夙儒張覃者未第詠與寇準致書郡
將薦覃為首眾許其能讓是歲詠登進士乙科授
大理評事知崇陽縣用蘇易簡薦入為太子中允
歷知麟相二州改濮州知浚儀縣擢荆湖北路轉
運使太宗聞其強幹召還超拜虞部郎中賜金紫
進樞密直學士同知銀臺通進封駁司出知益州
恩威並行蜀民畏而戴之真宗即位加左諫議大

夫入拜給事中改御史中丞同知貢舉會奏彈丞
相酒過出知杭州未幾復命知益州歸朝掌三班
領登聞檢院因患腦瘍乞解任命知并州大中祥
符三年召還抗言丁謂王欽若當誅章三上出知
陳州卒年七十贈左僕
射謚忠定有集十卷

悼蜀四十韻

蜀國富且庶風俗矜浮薄奢僭極珠貝狂佚務娛樂虹
橋吐飛泉煙柳閉朱閣燭影逐星沈歌聲和月落鬪雞
破百萬呼盧縱大噓游女白玉璫驕馬黃金絡酒肆夜
不扃花市春漸作禾稼暮雲連紈繡淑氣錯熙熙三十

年光景倏如昨天道本害盈侈極禍必作當時布政者
罔思救民瘼不能宣淳化移風復儉約情性非方直多
為聲色著從欲竊虛譽隨心縱貪攫蠶食生靈肌作威
恣暴虐佞罔天子聽所利惟剝削一方忿恨興千里攘
臂耀火氣烘寒空雪采揮蓮鍬無人能卻敵何暇施擊
柝害物黷貨輩皆為白刃爍瓦礫積臺榭荆棘迷城郭
里第鎖苔蕪庭軒喧鳥雀斗粟金帛酬束芻綺羅博悲
夫驕奢民不能飽葵藿朝廷命元戎帥師盪兇惡虎旅

一以至梟巢一何弱燎毛焰晶熒破竹鋒熠燿兵驕不
可戢殺人如戲謔悼耄皆麗誅玉石何所度未能剪強
暴爭先謀剽掠民生計空賒死心愁隕獲四野構豺狼
五畝孰耕鑿出師不以律餘孽何由卻鄙夫識蜂蠆寡
術能籠絡邊郵未肅清何顏食天爵世方尚奔馳誰復
振蹇誇黃屋遠萬里九重高寥廓時稱多英雄才豈無
衛霍近聞命良臣拭目觀奇略

縣齋秋夕

才薄難勝任空銷懶惰情公堂羣吏散苔地亂蟲聲隔
歲鄉書絕新寒酒病生方今聖明代不敢話辭榮

登麟州城樓

莫問戎庭苦高欄日夕攀時清官事少邊靜戍人閒雉
堞臨寒水穹廬倚亂山皇恩正無外不擬更移還

送別蘇寺丞

公身多不定何路慰飄離莫以微言合苦將幽思悲山
程朝醉少雪屋夜眠遲即問逢春約芳菲折贈誰

登黃鶴樓

重重軒檻與雲平，一度登臨萬想生。
黃鶴信移煙樹老，碧雲魂亂晚風清。
何年紫陌紅塵息，終日空江白浪聲。
莫道安邦是高致，此身終約到蓬瀛。

金陵郡齋述懷

傍人往往羨清途，野逸情懷亦自扶。
官舍四邊多種竹，潮溝一面近生蘆。
病嫌見客低徊甚，老覺臨官氣味麤。
不信浮名是身累，有時閒撚白髭鬚。

遊趙氏西園

蜀中春豔世間疎，比並陳園恐未如。
數里花光浮煖日，六街塵靜見香車。
翻空雅樂催歡處，入格新詩上板初。
方信承平無一事，淮陽閒殺老尚書。

歸越東舊隱留別秦中知己

客亭楊柳葉初殘，歌咽秋空慘別顏。
吟愛好峯歸越路，醉衝寒雨出秦關。
煙蘿庭戶重棲倚，漁浦人家舊往還。
縱使功名無分得，免教心在怨尤間。

再會傅逸人

分到知心死不輕幾年曾是愴離情
微風吹雨雁初下
落葉滿塔蟲正鳴燈盡苦嫌論劍畧
簟涼頻喜轉琴聲
從來共約雲泉老肯向人間占好名

郊居寄朝中知己

年來流水壞平田客徑窮愁自可憐
汀葦亂搖寒夜雨
沙鷗閒弄夕陽天狂嫌濁酒難成醉
冷笑清詩不直錢
碧落故人知我否幾回相憶上漁船

舟中晚望桃源山

仙山初指眼初明倚棹因妨半日程雲裏未忘尋去路
世間爭合有浮名崑空閣老松千尺天靜時聞鶴一聲
更謝暮霞憐惜別滿波紅影照崢嶸

貽傅逸人

少年名節動人羣避俗身居積水濱幾為典衣留遠客
半乘歌枕看閒雲門連酒舍青苔滑路近沙汀白鳥分
誰道無情活黎庶數篇新咏帶南薰

按史公幼與傅霖
同學既貴之後求

霖三十年不可得晚知陳州一日霖忽來謁公問昔何
隱今何出霖曰子將行矣來報子爾翼日辭去後一月
而公卒據此則傅霖乃學道通仙術者然公屢有會傅
逸人詩其踪跡未嘗疎濶即此作云門連酒舍留客典
衣亦非逃世絕俗之流也史所
載殆出於小說固未深考歟

雙龍寺

未踏關陽已見山木鯨時吼翠微間老僧隨隊看雲起
居士忘機共鶴閒入眼煙光依砌濕倚空霧氣傍一作繞

山環三朝寶訓神明護大讀經章祝玉顏

鶴

共憐潔白本天姿縱枉泥塵性不卑况是稻梁厭足日
好尋煙月卻歸時跡參詩雅何年始名係仙經四海知
應到昆丘指來歷曾陪鷓鴣浴華池

新蟬

脫塵還與比仙遊露腹何妨近品流嫩殼半遺紅藥地
細聲偏傍綠楊樓詩家取象吟難盡畫格偷真意不休
正好儒林擬綉拂馮唐無苦預悲秋

過華山懷白雲陳先生

性愚不肯林泉住，強要清流擬致君。今日星馳劍南去，
回頭慚愧華山雲。

雨夜

二首

四簷風雨滴秋聲，醉起重挑背壁燈。世事不窮身不定，
令人閒憶虎溪僧。

簾幕蕭蕭竹院深，客懷孤寂伴燈吟。無端一夜空階雨，
滴破思鄉萬里心。

寄傅逸人

當年失腳下漁磯
苦為明時未得歸
寄語巢由莫相笑
此心不是愛輕肥

送別王秘丞

帝鄉三十年前別
江外相逢鬢已衰
清論未窮行計速
為君臨水立多時

聞鷓鴣

畫中曾見曲中聞
不是傷情即斷魂
北客南來心未穩
數聲相應在前村

錢易

字希白，徽之從子。年十七舉進士，試崇政殿三篇，日未中而就。自此以才藻知名。太宗嘗嘆世無李、白、蘇、易、簡，曰：「今進士錢易，其人也。」欲召置翰林，不果。真宗朝再舉進士，以第二人。中第，除秘書丞、通判信州，改太常博士、直集賢院。遷尚書祠部員外郎，擢知制誥，官至翰林學士。倮直，未滿卒。仁宗憐之，召其妻盛氏入禁中，賜以冠帔。有集一百五十卷。

溫泉詩

悲哉天寶時，帝耄政不修。
寵幸尊婦人，陰極陽已柔。
外戚盛本枝，櫛比封列侯。
丞相大將軍，備位甚悠悠。
天下

安既久積漸力不周車服金玉煥黎庶饑寒愁驪山温
泉宮晝幸與夜遊一游百司備萬費一日休誰能心自
快化作社稷憂國忠恣吞噬林甫懷姦偷缺 雛據太原
鐘鼓無許收黃塵滿長安慘黷九廟羞唐天未使絕返
正知疾瘳自茲遊賞地荆棘生荒秋舊物悉已廢蜘蛛
挂重樓覽者咸寒心一過三迴頭因知帝王業堅固宣
鴻猷豈可信嗜欲侮弄生瘡疣

西遊曲

花銷秋老白日短敗紅荒綠迷空館擬將清血灑昭陵
幽谷蛇啼半山晚十年辭家勤獻書王孫不許延公車
江頭祖廟祭無日重門生草寒離離我有黃金三尺劍
姦骨餘痕古波艷佩入函關無故人玉握凋零七星暗

南兵

曾見南兵苦征遼事一如金瘡寒長肉紙甲雨生蛆山
小蠶霜骨河枯膾腐魚黎元無處哭丁戶日相疎

韓丕

字太簡華州鄭人幼孤貧有志操年長始學文太平興國三年進士嘗著孟母碑返魯頌人多誦之授大理評事通判衡州用石熙載薦試中書擢著作佐郎直史館歷知制誥丕文思艱澁宰相以其稽緩書命常加督責積不能平乃表求外郡出知虢州太宗嘉其冲澹自處召為翰林學士終以遲鈍不敏難任禁近三出典州就加禮部侍郎大中祥符二年卒

寄岳陽劉從事

秋來憶故人
寓目臨大野
遠近聞清商
依稀奏幽雅
經霜樹半紅
無風葉自下
一片洞庭心
聊憑塞鴻寫

菊

冷淡花枝寂寂闌，只緣開晚少人看。
若教總似陶潛眼，肯向芳春艷牡丹。

唐 異

文鑑載詩而履歷莫考，但其誓句在宋中葉時已盛傳，自是前輩勝流，未可與茫無籍里者同論也。

塞上作

防秋人不到，萬里絕妖氛。
馬放降來地，鷗盤戰後雲。
月依孤壘沒，燒逐遠荒分。
未省為邊客，宵茄懶欲聞。

閒居書事

幽居輕宿雨屐齒漏林塘一境無過客千山自夕陽
畫禽多獨語夏木有餘涼招隱詩慵寄時清誰肯忘

羅處約

字思純益州華陽人父濟仕蜀歸朝至太常丞處
約登太平興國中進士知吳縣時王禹偁知長洲
縣日以詩篇唱和蘇杭間多傳誦後並召
直史館處約終荆湖路巡撫年三十三

泛太湖

三萬六千頃湖侵海內田逢山方得地見月始知天
南國吞將盡東溟勢欲連何當灑為雨無處不豐年

潘閻

字道逆錢塘人與王禹偁孫何魏野輩游處
最歡放懷湖山吟詠自適人以謫仙擬之

叙吟

高吟見太平不恥老無成髮任莖莖白詩須字字清搜
疑滄海竭得恐鬼神驚此外非闕念人間萬事輕

夏日宿西禪

此地絕炎蒸深疑到不能夜涼知有雨院靜若無僧枕
潤連雲榻牕明照佛燈浮生多賤骨時日恐難勝

歲暮自桐廬歸錢塘晚泊漁浦

久客見華髮孤檣桐廬歸新月無朗照落日有餘輝
漁浦風浪急龍山煙火微時驚沙上雁一一背南飛

落葉

片片復落落園林漸向空幾番經夜雨一半是秋風
靜擁莎階下閒堆蘚徑中谷松與巖檜寧與此時同

渭上秋夕

秋色滿晴川登臨渭水邊殘陽初過雨何樹不鳴蟬
極

浦涵新月孤帆沒
遠煙漁人空老盡
誰似太公賢

望華山

高愛三峯插太虛
昂頭吟望倒騎驢
旁人大笑從他笑
終擬全家向上居

宋太宗晚年燒丹
閨曾獻方書及帝
升遐懼罪乃變
姓名匿舒州濳山
寺為行者後真宗
赦其罪以為滁
州叅軍卒

路振

字子發永州祁陽人淳化中進士試卮言日出賦
太宗嘉其典曠擢置甲科由通判邠州召直史館
大中祥符初使北歸撰乘輅錄以獻擢左司諫知
制誥振文詞溫麗屢奏賦頌為時輩所稱尤長詩

詠卒年

五十八

伐棘篇

伐棘何所山之巔秋風颼颼棘子丹折根破抵堅且頑
斲夫趙趙汗污顏攢鋒束芒趨道還稊之森森繚長藩
暮冬號風雪暗天漏寒不鳴守犬眠主人堂上多金錢
東陵暴客來窺垣舉手觸鋒身隕顛千矛萬戟爭後先

襟袖結裂不可揜蹠破指傷流血殷神離氣沮走踰蹏
數尺之墻弗復攀無知小醜騷河壩朔方屯師連七年
木波馬領沙填填氣脈不絕如喉咽官軍虎怒思吼軒
強弩一發山河穿將不叶謀空即安翫養蟻寇成兇顛
推蜀挽粟徒喧喧邊臣無心靖國艱為余諷此伐棘篇

种放

字明逸河南洛陽人性沉默好學少志山林奉母
隱終南豹林谷用張齊賢薦召赴闕授司諫進右
諫議大夫真宗春遇特厚始終
不衰晚節耽名利時論薄之

夏日山居

陰陰林木靜寂寂無人境
紅綻紫葳香嵐沈玉膏冷看
雲時獨坐慎事常中省
何容馭風來新篁動疎影

諭蒙詩

大瀛卑百瀆自成浮
天澗崇丘下累塊竟為蔽
日深王者在謙小
夙推堯禹心拜言尊賢
仁慎德棄珠金自滿
九族散匪驕百善尋炳
茲夏商鑒滅國因誇淫

酬陳齋民見寄

竹扉常晝掩幽僻置身安自委漁樵分因思出處難周
庭方設燎漢將尚封壇莫問煙霞意人寰事萬端

寇準

字平仲華州人太平興國中登進士時年十九淳
熙五年參知政事定策立真宗為太子景德元年
拜平章政事決親征之策封萊國公
以丁謂之譖貶雷州司戶卒謚忠愍

暇日遊建平三閭故里廟貌荒涼慘動耳目噫賢
者之祀世不絕享郡無正人遺棄若是感事傷

俗因留斯句

人生若遠遊多是悲登眺况復念三閭遺蹤良可吊道
直出章華才高逐邊徼冤聲噴夜江愁色迷煙嶠斷碑
沒敗莎古木吟荒廟祠破少薦馨岼峻稀停擢神容漬
老苔壞壁通殘照舊徑失朱門空庭起寒燒餘基雖索
寞清問長光耀旌賢誰再興勿使過者誚

水閣晨起

板閣長晏眠偶獨起清旦月落簷鳥語煙開客船散長
江色自澄汀樹聲空亂羣動又復然勞勞可長歎

晚望有感

出門望寒野四顧惟椒坡憶昔楚大夫還此情如何殘
陽半明雨水落西風多因同下蔡恨不覺增悲歌

長郊雨餘遠樹減翠新蟬忽鳴激耳嘹唳久客孤
坐情如何哉形之於文聊以自遣

遙山夏雨歇遠樹涼風至憑欄偶開襟新蟬動秋思沙
溪潔細流庭木驚踈翠節候又復然幽憂斯所萃芳歲
若奔流羲光不停轡感物悼前期誰知此時意

江南春

波渺渺柳依依孤村芳草遠斜日杏花飛江南春盡離
腸斷蘋滿汀洲人未歸

春日登樓懷歸

高樓聊引望杳杳一川平遠水無人渡孤舟盡日橫荒
村生斷靄深樹語流鶯舊業通清渭沈思忽自驚

再歸秦川

阮路何方盡西歸興未勞河流經陝狹山色入秦高返

照明秋壘孤村接暮濤還如丁令至故里滿蓬蒿

秋夜勉友

西風驚萬木危坐思悠哉故國經年別秋鴻半夜來人
應多棄善天豈不憐才休學嚴夫子荒涼老釣臺

秋日原上

蕭蕭古原上景物感離腸遠嶠收殘雨寒林帶夕陽溪
聲迷竹韻野色混秋光吟罷還西望平沙起雁行

秦中感懷寄江外知己

念子隔江海浩然時已秋
蟬鳴關外樹人在水邊樓
髮白猶搜句時清尚旅遊
遙思當永夜不寐向孤舟

水村即事

虛齋臨遠水吟釣度朝晡
葦岸秋聲合莎亭鶴影孤
片雲藏疊嶽野燒起寒蕪
獨步時吟望離人隔五湖

冬夜旅思

年少嗟羈旅煙霄進未能
江樓千里月雪屋一龕燈
遠信憑邊雁孤吟寄嶽僧
爐灰愁擁坐硯水已成冰

感興寄蓮嶽一二詩禪友

西風傷遠別前計竟成非芳草此時暮故山何日歸
禪應同雅道貧合長天機翻憶雲浮侶無慘對夕暉

湖上作

極目望南浦望中生遠思雁沈芳草渡燒斷夕陽陂
歲月寒萍梗江山念別離惟餘清夜夢暫與白雲期

楚江夜懷

西風生遠水蕭颯度吟臺明月夜還滿故人秋未來
寒

蛩啼暗蟀敗葉下蒼苔誰念空江外年年首重迴

送人

客亭殘照裏歌闌獨南行芳草無斷色旅人多別情遠
塗方不極長笛更飛聲莫動鄉關念徒令白髮生

巴東驛秋日晚望

楚驛獨閒望山村秋暮天數峯橫夕照孤笛起江船遣
恨須言命冥心漸學禪遲遲未回首深谷暗寒煙

東歸再經峽中

復命經三峽波瀾極目愁片雲生斷壁孤石礙中流道
路連巴塞風煙接楚丘重來登望處因念昔年遊

荆南秋望

西風吹戶牖獨自客荆蠻積水浮秋漢微陽淡遠山蟬
稀疎葉盡雨歇片雲閒何日忘替紱深居石室間

夜泊江上

歲暮峽中村維舟古樹根羣峯初落月後夜獨聞猿流
水自無盡客愁那可論平明離楚岫迢遞指吳門

應制賦牡丹花

時正言
直館

栽培終得近天家，獨有芳名出衆花。
香遞暖風飄御座，葉籠輕靄襯明霞。
縱吟宜把紅牋擘，留賞惟張翠幄遮。
深覺侍臣千載幸，許隨仙仗看穠華。

巴東寒食

春雨蕭蕭寒食天，遠行猶在楚江邊。
人思故國迷殘照，鳥隔深花語斷煙。
薄宦未能酬壯節，良時空自感流年。
因循未學陶潛興，長見孤雲倍黯然。

過霧山

青燈古殿枕寒溪，門外天垂斗柄低。
啼鳥不知春向背，落花依舊水東西。
半橋霜月光相照，一帶松煙色未齊。
誰料百年榛莽地，香雲今日繞輪蹄。

南浦

春色入垂楊，煙波漲南浦。
日落動離魂，江花泣微雨。

送轉運梅學士進邊郡

悵飲惜離羣，窮邊去路分。
雪深山館夜，孤雁背燈聞。

初夏雨中

綠樹新陰暗井桐
雜英當砌墜疎紅
重門寂寂經初夏
盡日垂簾細雨中

歸州留別傅君

揚柳如絲拂畫橋
此中留語欲魂銷
還愁別後巴東館
獨聽空江半夜潮

柳

曉帶輕煙間杏花
晚凝深翠拂平沙
長條別有風流處

密映錢塘蘇小家

無題

金甲珠襦鏤繡扁杜城殘月葬娥英春風候館花如雪
空有鶯傳度曲聲

南平驛

心隨流水還鄉國身向青山上屈盤
遠夢不成秋雨細
西風一夜客亭寒

春陵聞雁

危欄秋盡偶來凭
霜落秋山爽氣澄
誰道衡陽無雁過
數聲殘日下春陵

秋日

柳衰蟬噪寒煙沒
地迥山遙暮雨收
宛是昔年秋氣味
只添多病與離愁

輦下春日

雨餘宮闕麗春陰
三月花光照上林
誰倚青樓望歸騎
日斜南陌柳煙深

錢惟演

字希聖吳越王俶之子從俶歸朝為神武軍將軍
博學能文詞召試學士院以笏起草立就真宗稱
善改太僕少卿歷知制誥給事中翰林學士遷尚
書工部侍郎仁宗即位進兵部初附丁謂以傾寇
準後復擠謂自解宰相馮拯惡其為人罷為鎮國
軍節度改武勝軍節度使雅奠柄用抑鬱不得志
而卒太常張瓌請謚文墨詔覆議改謚曰思惟演
文詞清麗與楊億劉筠相上下所著典故集三十
卷

槿花

綺霞初結處珠露未晞時寶樹寧三尺華燈更九枝亭

亭方自喜黯黯卻成悲欲作飛煙散猶憐返照遲

秋夕池上

珪月上金塘煙容帶水光朱華接蘭坂綠荇溢魚防叢
暗禽棲密林疎露下涼秋懷已潘鬢無奈更啼螢

始皇

天極周環百二都六王鐘鏹接流蘇金椎漫築甘泉道
七首還隨督亢圖已覺副車驚博浪更攜連弩望蓬壺
不將寸土封諸子劉項繇來是匹夫

漢武

一曲橫汾鼓吹迴侍臣高會柏梁臺金芝雪煜凌晨見
青雀軒翔白晝來立堠東溟邀鶴駕窮兵西極侍龍媒
甘泉祭罷神光滅更遣人間識玉杯

南朝

結綺臨春暎夕霏景陽鐘動曙星稀潘妃寶釧光如畫
江令花牋落似飛蚱蜢臨波朱火度觚稜拂漢紫煙微
自從飲馬秦淮水蜀柳無因對殿幃

詠唐天寶間事

山上湯泉架玉梁雲中複道吐瑤光
絲囊暗合三危露
翠幃時遺百和香
任走金雞親便坐
更拋珠被掩方牀
匆匆一曲梁州罷
萬里橋邊見夕陽

成都

武侯千載有餘靈
壘石刀痕尚未平
巴婦自饒丹穴富
漢庭還責碧砮征
雨經蜀市應和酒
琴到臨邛別寄情
知有忠臣能叱馭
不論雲棧尚崢嶸

公子

蓮勺交衢接沁園來時十里一開筵歌翻南國桃根曲
馬過章臺杏葉鸞別殿對迴雙綬貴後門歸夜九枝然
閒隨翠幘歌烏帽紫陌三條入柳煙

宋玉

章華清宴重遊陪已有微詞更有才神女夢靈因賦感
屈平魂怨待招迴悲秋千古情難盡障袂何時望可來
祇用大言君自許景差無計上蘭臺

寄靈仙觀舒職方學士

方瞳玄髮粉闌郎絳闕齋心奉紫皇徵士高懷雲在嶺
騷人秋思水周堂閒園露草開三徑靈宇華燈燭九光
知有美田堪種玉幾時春渚逐歸航

無題

誤語成疑意已傷春山低斂翠眉長鄂君繡被朝猶掩
荀令薰爐冷自香有恨豈因燕鳳去無言寧為息侯亡
合歡不驗丁香結秖得淒涼對燭房

苦熱

赫赫烘霞鬪曉光
雙紋枕簟碧牙牀
頻傾蜜勺寧蠲渴
久捧冰壺未覺涼
雪嶺卻思隨博望
風牕猶欲傲羲皇
更憐乳燕翻飛處
深入盧家白玉堂

秋日小園

碧簟涼生白袷衣
庾園秋晚得幽期
千房嫩菊金螢亂
百葉衰荷鈿扇敝
日薄蘚花沿素壁
雨淫蛙鼓占清池
淪然自合蒙莊趣
誰識無心似標枝

休沐有懷

雕盤瓊蓋冰

去聲

寒澌密樹蟬嘶下直時更賦新詩答靈

運不將團扇隔元規經旬綠草沿階上盡日流風轉蕙
遲祗待觚稜照初旭橫經還集絳紗帷

艷體 三首

絳縷初分麝氣濃絃聲不動意潛通圓蟾可見還歸海
媚蝶多驚欲御風紈扇寄情雖自潔玉壺盛淚祗疑紅
春牕亦有心知夢未到鳴鐘已旋空

耿耿寒燈照醉羅
看朱成碧意如何
虎頭辟惡無妨枕
犀角涼心更待磨
惟有幽蘭啼月露
可將尺素託雲波
山屏六曲歸來夜
祇恐重投折齒梭

香歇環沈無限猜
春陰濃淡畫簾開
有時盤馬看猶懶
盡日投壺笑未迴
蝶怨豈能重傅粉
雉驕疑待更求媒
啼妝不治金翹閣
腸斷溫郎玉照臺

直夜

千廬微道發傳呼
帝宇沈沈辟月孤
重燎祇聞喧鬪鼠

危枝誰見逸驚鳥石螭霜重連鈎盾玉虎冰消下轆轤
素髮自憐同騎省一竿何日釣秋鱸

淚

家在河陽路入秦樓頭相望祇酸辛江南滿目新亭宴
塞外傷心故國春仙掌倚天頻滴露方諸待月自涵津
荆王未辨連城價腸斷區區抱僻人

送許洞歸吳

草薰風暖接長亭一曲驪歌倒醪醕懷古更投玄石賦

艤舟聞采紫莖萍醉拋隋岸楊花白吟過淮山桂樹青
可使長離終鍛羽淵雲詞藻出天庭

初秋屬疾

蜜脾初滿石榴紅秋意先侵玉井桐薤草自憑南郭几
穀巾猶領北牕風雲迷候雁辭遙塞露濕飛螢起暗叢
病已不須傳七發粉牋香墨寄詩筒

懷舊居

武祀仙壇接里閭琴堂水閣半凌虛竹林舊享銅盤食

門巷今容駟馬車
楚國大言登宋玉
漢家荅詔用相如
未知茄鼓歸何日
空鑷鱸庭春草疎

小園秋夕

潘鬢秋來已自傷
庾園時物更荒涼
紫梨半熟連紅樹
碧蘚初圓亂縹牆
月露暗從孤桂滴水
風猶獵敗荷香
滑稽還喜鳴夷在
欲取臨邛美酒嘗

與客故明

越溪微霰灑寒梅
家近嚴陵古釣臺
夢欲成魚通夕去

書曾憑犬隔秋迴千時不為侏儒粟樂聖猶銜叔夜杯
帝右豈無揚得意漢宮須薦長卿才

送客不及

橋濶川長恨已多斑駁嘶斷隔雲羅遙山幾疊迷朱旆
芳草經時駐玉珂高鳥可能追夕照綠楊空自拂微波
短轅白鼻何由得目送層樓一雁過

再次韻和大年

雲變危峯萬里橫草鋪湘水一牀平紅蘭受露消晨渴

綠蕙翻風折夜醒
逸少偶書葵扇貴
羊欣閒臥練裙輕
無妨天下芝泥熟
獨看瑤光近太清

館中新蟬

習習光風泛紫蘭
新聲含怨日將殘
自憐伴省成團扇
誰許迎秋集武冠
委蛻亭臯隨木葉
飛縷雲表拂仙盤
青蔥玉樹連金爵
不覺醯雞競羽翰

梨

紫花青蒂壓枝繁
秋實離離出上闌
東海圓珪無奈碧

崦山甜雪不勝寒已憂仙佩懸珠重更恐金刀切玉難
自與相如解消渴何須瓊葢作朝餐

柳絮

三月江南花漸稀春陰漠漠雪霏霏章臺街裏翻輕吹
灞水橋邊送落暉陸凱傳情梅暗落韓憑遺恨蝶爭飛
不知化作萍飄否惟見紛紛上客衣

再賦荷花

玉甃引清泉風高露白天盈盈臨一水
幕幕隔長煙已

分蘭芝弱仍憂趙后仙
鮫絲衣更密珠蚌淚長圓
瑟怨來湘浦鴻鷺近洛川
金塘正斜照誰倚木蘭船

上巳玉津園賜宴

漢家傳洛飲楚俗泛蘭泉
玉液初頒酒金盤屢擊鮮
珥彤尋竹籞傾蓋集芝廛
錦羽翻晴旭霞英落暖煙
雅音和舜樂睿澤洽堯天
更聽承雲曲同歌在鎬年

致齋太乙宮

齋潔奉惟馨瑤臺獨自升
樓迷五里霧壇燭九枝
燈珠

館來青雀璇題射玉繩
疎鐘平野濶古柏夕霏凝
鶴扇真窺月仙衣可鏤冰
春茶泛雲液曉飯薦蘭蒸
鍊藥疑洪井藏書類羽陵
回瞻大帝室飛檻更長憑

夜讌

昨夜宴南堂華燈燭九光
削青爭落筆舉白鬪飛觴
祇覺輝裴玉寧思夢謝塘
解煩憑蜜勺藉俎半蘭房
促席風絃怨開簾月露涼
酡顏君莫訴西北轉銀黃

宣曲

絳縷初分後銀環未解時已障紈扇笑猶捧玉壺悲乞
巧長生殿迎風太液池雕屏涵火齊寶帳隔琉璃欲買
詞人賦空傳狎客詩蔗漿消內熱瓊蓋療朝饑綺蒂桃
初熟紅心草欲披凌波渡羅襪向日翳華芝素臉分甘
柰香津滴紫梨龍梭隨振素懶髓補凝脂蓬餌重陽節
金針七夕期玉膏當恣溢翠蓋逐歲蕤弦急哀隨指歌
長恨入眉青鸞惟有舞赤鳳可能疑下蔡迷還易平陽
破未知髻高釵自墜腰細佩長垂出恐嚴鐘晚歸嫌細

慙遲轆轤驚曉夢鸚鵡漏春思魂怨惟愁斷腸柔已自
危辭璫螢影度瓊戶蘚花滋掩鼻讒難訴披圖悔豈追
祇應金帶枕脚為達微詞

別墅

別館斗城傍斜軒映曲房蒼頭冠綠幘中婦織流黃復
道登平樂期門集未央意錢梁冀宅挾瑟莫愁堂走馬
章臺柳停車陌上桑鼓弓隨寶帳投轄付銀牀出戴繁
星急歸衝細雨忙曾過阿君宿醉舞起跳梁

清風

溽暑迎秋盡涼飈逗曉迴
陸桐侵玉井拂柳度章臺
已覺雲翹動還驚月幌開
鮫簾移亂影瑤瑟泛餘哀
扇掩藏鸞羽荷傾側露杯
正當河左界不待雨東來
自好傳垂翼寧勞起死灰
楚宮誰第賦宋玉最多才

屬疾

積日勞無補彌天疾未瘳
馬卿非避事盛憲自多憂
目眩花成果心驚蟻鬪牛
幽冰那沆熱洛笛更生愁
拂枕

牕風度穿簾隙日流唾壺從已缺博齒亦慵投發篋尋
桐籙支頤動越謳平生江海志夕夢繞滄洲

荷花

水濶雨蕭蕭風微影自搖徐娘羞半面楚女妬纖腰別
恨拋深浦遺香逐畫橈華燈連霧夕鈿合映霞朝淚有
鮫人見魂須宋玉招凌波終未渡疑待鵲為橋

戊申年七夕

烏鵲飛來接斷雲祇貪清淺渡星津不知一夜支機石

卻屬來槎上漢人

玉露金河顥氣涼
辛夷車轉桂旗香
姮娥可是多猜忌
不駐瓊輪放夜長

一歲佳期一夕過
羽旗雲蓋涉微波
明朝若寄相思淚
玉枕金莖得最多

青鳥當時下紫雲
綺囊書秘露桃新
莫嫌夜半移牀遠
朱雀牕中別有人

驪阜凌雲對玉鈎
千門高切絳河秋
欲聞天語猶嫌遠

更結三層乞巧樓

宋元詩會卷三

欽定四庫全書

宋元詩會卷四

兵部主事陳焯編

楊億

字大年建州浦城人生有毛被體尺餘經月乃落
七歲能屬文雍熙初太宗聞其名召試詩賦五篇
下筆立成深加賞異命內侍送至中書宰相表賀
翌日下制曰汝方髫鬣不由師訓精爽神助文字
生知越長絕塵一日千里深有望於汝也即授祕
書省正字賜袍笏俄丁外艱淳化中詣闕獻文命
試翰林賜進士第遷光祿寺丞真宗即位超拜左
正言預修太宗實錄書成乞外補就養知處州召

還知制誥景德初加通進銀臺司兼門下封駁事
俄判史館與王欽若總修冊府元龜億素薄其人
欽若銜之又陳彭年方以文學進忌億名出其右
相與毀訾上不為動天禧二年拜工部侍郎官至
翰林學士四年十二月卒年
五十七集一百九十四卷

禁直

鳳樓鴛瓦蟾波濕衆籟聲沈百蟲蟄仙盤雲表露成霜
何人夜半牛衣泣芝泥香熟封詔書河漢西傾移斗車
陰風撼撼起庭樹寒淅淅戛戛鳴宮渠千廬迭唱傳宵警
海山鰲背蓬壺頂金釭珠網結綺錢玉井銀牀垂素綆

前席受釐詢碩生觀書百行須中程投籤乍應嚴鼓節
求衣誤聽蒼蠅聲渴烏漏盡繁星曙魚鑰建章開萬戶
初日瞳矐豔屋梁鳴鞭一聲天下路

秋夕池上

蓮塘帶弋林清吹滌煩襟泉咽猶鳴玉臺傾舊築金僵
桃蟲自蠹怪石蘚交侵此夜悲秋客烟蛩亦伴吟

直夜

月魄生宵暈風雷送晚涼飛蠅隨鏤管浮蟻溢清觴負

郭春耕廢釣天曉夢長玉籤聲未斷落宿半宮牆

偶懷

銀燭飛晴霰蘭英湛凍醪年光侵蒜髮春恨寄雲袍燕
重銜泥遠鴻驚避弋高平生林壑志誤佩呂虔刀

即日

急雨度前軒池荷相對翻峰青雲待族蹊閭李無言捉
鼻生愁咏披襟爽醉魂一廛今已廢猶戀漢庭恩

霜月

月夕露為霜心知厭獨房吟殘猶擁鼻望極自回腸鬢
減前秋綠衣消外國香星津誰待報織素未成章

夕陽

夕籟起汀葭秋空送目賒綠蕪平度鳥紅樹遠連霞水
濶迷歸櫂風清咽迴笳高樓未成下天際玉鉤斜

槿花

宿霧初披縠晨霞暫照梁千金輕一笑七駕未成章塵
暗神妃襪衣殘侍史香深情傳寶瑟終古怨清湘

禁中庭樹

直幹依金闥繁陰覆綺楹
纍珠晨露重嘒管夜蟬清
霜桂丹丘路星榆北斗城
歲寒徒自許蜀柳笑孤貞

宋殿丞廣南東路轉運

天子憂南越公卿薦陸生
九年須富國萬里便揚旌
封部諸蠻接官曹六尚榮
交州何日到鼓吹定相迎

奉和御製社日詩

仙掌凌空沆瀣秋
大田多稼似雲浮
天邊霽景芙蓉闕

江上殘芳杜若洲東觀羣儒宣宴樂南荆遺俗重嬉遊
宸章忽降容欣覩疑是神龜負九疇

別賦賞花

仙山靈沼五城西曉日花光照彩霓露濯冰蠶鋪瑞錦
風吹水麝折香臍芳葩散採添蜂蜜紅片狂飄雜燕泥
曾識壺中舊春色桃源重到路猶迷

偶書

朱輪遠守詎成歡薄宦令人意漸闌郡閣政清慵按吏

鄉園路近易休官
梅花遶檻驚春蚤
布水當簷覺夏寒
已是三年不聞問
何如歸去把漁竿

題張濬所居壁

三張舊族富英髦
仙墅重經散鬱陶
深喜太丘家法在
須知定國里門高
分題每日搖鷄距
合宴常時把蟹螯
獨感戴侯恩未報
徘徊不覺涕沾袍

留題黃山院

禾黍離離一徑通
遊人攬轡即過從
趨齋幽鳥聞疎磬

出定高僧記偃松夜半龕燈凝古殿雨餘巖溜迸前峰
昔年曾此題名處素壁欹斜翠蘚重

梁舍人奉使巴中

藥署深巖纔草詔劍關迢遞忽乘輶霜天歷歷巴猿苦
山路駸駸笮馬驕梁苑寒風吹別袂瞿塘春水送歸橈
紫垣遣使非常例應有星文動九霄

次韻和盛博士雪霽之什

六花新霽白皚皚爽氣颼颼拂面來梁苑酒濃寒力減

謝池風細凍文開
天邊幾陣聞歸雁
江外千家見蚤梅
此際何人能訪戴
剡溪清景足銜杯

閣門廖舍人知袁州

駸駸五馬動征塵
太守風流世絕倫
身事漢庭為小相
家傳楚國是騷人
烟波莫歎重湖遠
桑梓仍將別墅鄰
麥穗微黃稻苗綠
朱輪入境便行春

次韻和宗人安期見賀恩命之什

分班曉入翔鸞闕
直閣旁連浴鳳池
綵筆閒批五色詔

好風時動萬年枝
勒移鍾阜慙歸晚
稱疾文園恨思遲
何事吾宗心倍喜
春塘夢徹寄新詩

成都鳳道人遊終南山謁种徵君

何年出蜀訪南宗
深鎖閒房翠蘚重
振錫忽聞遊地肺
題門兼得謁人龍
供吟一路高秋月
投宿斜陽遠寺鐘
到日彌天清論罷
行尋紫閣與圭峰

王中庸赴河南鞏縣尉

春風祖席引香醪
白馬驪駒草色袍
官舍前臨兩京道

居民半雜五陵豪
卑飛碌碌猶棲棘
餘地恢恢暫鼓刀
捧檄初同昔人喜
不應搔首歎徒勞

王殿丞通判桂州

科名得玉向崑丘
家世長淮入海流
通籍殿中鈎盾省
頒條嶺外桂林州
漢皇前席期清夜
楚客歸帆指素秋
父老歡聞鄰郡政
壺漿千里待鳴騶

慎大詹以吳柑見貺

龍陽休說木奴洲
震澤黃柑占上流
承露玉漿仙掌曙

亞霜金顆洞庭秋香黏素手吳娃麗冷滌朝醒楚客愁
應似荔枝催入貢隨河飛鳥逐鳴騶

祕閣舒職方知舒州

西崑冊府控千廬鉛筆多年校魯魚厭享雙鷄大官膳
貪乘五馬使君車明光畫省辭青鎖天柱仙壇訪紫書
只恐政成拋印綬攜家深入白雲居

擇良上人歸天台

片席然犀經水府幾程登陸望霞標吟情晚日繁雲合

歸路秋風密葉凋行道六時廬嶽漏浮杯千里浙江潮
舊房宴坐觀空後香積多年飯頓銷

遊王氏東園

名園聊得拂塵衣深入春叢一逕微萬樹未饒金谷富
百畦猶有漢陰機青蘋風暖天鷄出文杏巢乾海燕歸
向晚鳴騶九門路柳堤回首獨依依

書懷寄劉五

風波名路壯心殘三逕荒涼未得還病起東陽衣帶緩

愁多騎省鬢毛斑五年書命塵西閣千古移文愧北山
獨憶瓊枝苦霜霰清樽歲宴彊醅顏

吳待問之蒙城簿

西來赴調合關繻黃綬風塵厭九衢祖席且同開口笑
公庭未免折腰趨長安車馬偏欺客魯國衣冠肯戲儒
共憶故園歸計晚舊遊烟樹隔重湖

休沐述懷寄祕閣錢少卿

風號電笑雨平堦紈素微涼暗入懷畫枕乍成園吏夢

晨蔬聊學太常齋名慙引籍通丹地心愧移文刻翠崖
大隱金門猶自適日親方朔聽詼諧

始皇

衡石量書夜漏深咸陽宮闕杳沈沈滄波沃日虛鞭石
白刃凝霜枉鑄金萬里長城穿地脈八方馳道聽車音
儒坑未冷驪山火三月青烟遶翠岑

漢武

蓬萊銀闕浪漫漫弱水回風欲到難
光照竹宮勞夜拜

露溥金掌費朝餐力通青海求龍種死諱文成食馬肝
待詔先生齒編貝那教索米向長安

南朝

五鼓端門涵漏稀夜籤聲斷翠華飛繁星曉埭聞鷄度
細雨春場射雉歸步試金蓮波濺襪歌翻玉樹涕沾衣
龍蟠王氣終三百猶得澄瀾對敞扉

唐明皇

玉牒開觀檢未封鬪鷄三百遠相從紫雲度曲傳浮世

白石標年鑿半峰
河朔叛臣驚舞馬
渭橋遺老識真龍
蓬山鈿合愁通信
回首空濤一萬重

宋玉

蘭臺清吹拂冠綏
蘿草新居對渺瀰
麗賦朝雲無處所
羈懷秋氣動齋咨
三年送目愁鄰媛
七澤迷魂怨楚詞
獨有江南哀句在
更傳餘恨到黃

闕

成都

五丁力盡蜀川通
千古成都綠酎醲
白帝倉空蛙在井

青天路險劍為峰漫傳西漢祠神馬已見南陽起卧龍
張載勒銘堪作戒莫矜函谷一九封

舊將

平生苦戰憶山西拊劍臨風氣吐霓戟戶當衢容馬
降缺遠帳列生犀新豐酒滿清商咽武庫兵銷太白低
髀肉漸生衣帶緩蚤朝空聽汝南鷄

洞戶

洞戶飛甍接綺寮一春幽恨寄蘭苔書題枉是藏三歲

壺矢誰同賽百嬌
水國風霜凋社橋
仙山雲霧隔江潮
東城劍騎何曾出
祇為離愁髀肉消

淚

寒風易水已成悲
亡國何人見黍離
枉是荆王疑美璞
更令楊子怨多岐
胡笳暮應三搥鼓
楚舞春臨百子池
未抵索居愁翠被
圓荷清曉露淋漓

赤日

赤日亭亭晝正賒
長風萬里憶星槎
銅盤瑤藥三危露

素縷寒漿五色瓜
蘭室冷光浮玉簾
柳營清吹逐金茄
翠微泉石終南路
千古離宮倚曙霞

七夕 二首

金壺漏滴正迢迢
靈匹相從在此宵
月魄嬋娟烏遶樹
河流清淺鵲成橋
雲輕天上榆花沒
風細爐中麝炷飄
寂寞堪憐觀渡女
無眠耿耿望青霄

清淺銀河暝靄收
漢宮還起曝衣樓
共瞻月樹憐飛鵲
誰泛星槎見飲牛
弄杼暫應停素手
穿針寧待貺明眸

匆匆一夕填橋苦不似人間有造舟

無題 六首

曲池波暖蕙風輕
頭白鴛鴦占綠萍
才斷歌雲成夢雨
斗回笑電作嗔霆
湘蘭自古傳幽怨
秦鳳何年入杳冥
不待萱蘇蠲薄怒
閒堦鬪雀有遺翎

合歡蠲忿亦休論
夢蝶翩翩逐怨魂
祇待傾城終未笑
不曾亡國自無言
風翻林葉迷歸燕
露濕池荷觸戲鴛
湘水東流何日竭
烟篁千古見啼痕

滿天飛絮罨游絲
鈿砌苔錢晦
碁北渚自應流
怨淚東鄰誰敢效
曠眉姮娥桂獨成
幽恨素女弦多有
剩悲幾夕空機愁
促杼銀河休問報
章遲

巫陽歸夢隔千峰
辟惡香銷翠被空
桂魄漸虧愁曉月
蕉心不展怨春風
遙山黯黯眉長斂
一水盈盈語未通
謾托鷓鴣傳恨意
雲鬢日夕似飛蓬

銅盤蕙草起青烟
斗帳香囊四角縣
沈約愁多徒自瘦
相如意密有誰傳
金塘雨過猶疑夢
翠袖風迴祇恐仙

日上秦樓休寄咏東方千騎擁輜軒

露冷星翻月上弦幾枝銀燭照金鈿應知韓掾偷香夜
猶記潘郎擲果年天際明河雖可望苑中高柳未經眠
烏啼人散青樓曉堂上清風轉莢錢

代意

三首

夢蘭前事悔成占却羨歸飛拂畫簷錦瑟驚絃愁別鶴
星機促杼怨新練舞腰罷試收紈袖博齒慵開委玉奩
幾夕離魂自無寐楚天雲斷見涼蟾

短夢殘妝慘別魂
白頭詞苦怨文園
誰容五馬傳心曲
祇許雙鸞見淚痕
易變間隨南地橘
忘憂虛對北堂萱
回文信斷衣香歇
猶憶章臺走畫轅

路隔仙源不可尋
紫牆霜戟夜沈沈
緘情謾託傳書雁
換笑空餘取酒金
翡翠巢成珠樹密
驪龍睡起玉淵深
新知自樂生離苦
年少情多豈易禁

梨

繁花如雪蚤傷春
千樹封侯未是貧
漢苑漫傳盧橘賦

驪山誰識荔枝塵
九秋青女霜添味
五夜方諸月溜津
楚客狂醒朝已解
水風猶自獵汀蘋

柳絮

瓊蘂飄英逐吹繁
建章飛舞入千門
羗人自怨殘梅曲
莊叟還迷夢蝶魂
漢苑風光隨獵騎
洛城風雪撲離尊
錦帆蔽日隋隄遠
枉逐東流箭浪翻

荷花

翠幄飄香映綺襦
鈿盤清曉露如珠
休啼為近鮫人室

欲見誰投玉女壺
雲氣乍迴巫峽夢
水嬉猶記曲池圖
金花却薦何人步
枉遣凌波襪縷濡

懷人

碧樹銀塘接畫樓
天人誰肯降瓊輶
三山密信傳青雀
五日歸鞭躡紫騮
郢酒泛冰星弁側
吳歛倚瑟黛蛾愁
雲峰得句懷真賞
瘦盡東陽沈隱侯

休沐端居有懷希聖

凝塵滿榻素琴橫
岸幘孤吟意未平
茗粥露芽銷晝夢

蘇漿雲液浣朝醒水沈朱李金瓶澁風獵幽蘭羽扇輕
獨憶當筵試湯餅謫仙冰骨照人清

館中新蟬

碧城青閣好追涼高柳新聲逐吹長貴伴金貂尊漢相
清含珠露怨齊王蘭臺密侍初成賦河朔歡游正舉觴
雲鬢翠綏徒自許先秋楚客已回腸

小園秋夕

鴻都歸晚禁城賒牆外連營咽暮砧玉井梧傾猶待鳳

金塘柳密更藏鴉
心搖雲闕傳疎漏
目斷星津過迴槎
已是秋來移帶眼
可堪玄鬢有霜華

寄靈仙觀舒職方學士

綠髮深潛不記年
却尋丹竈味靈篇
華陰學霧還成市
彭澤橫琴豈要絃
曉案祇應餐沆瀣
夜灘誰見弄潺湲
須知吏隱金門客
待乞刀圭作地仙

送客不及

青門祖帳曙烟微
片席乘流鳥共飛
曲岸馬嘶風嫋嫋

短亭人散柳依依
灞陵目斷猶回望
楚水魂銷為送歸
祇自河梁傳怨曲
洛塵千古化征衣

直夜

繚垣巍闕雲深處
畫燭熏爐對擁衾
三殿夜籤傳漏箭
九秋霜籟入風琴
階前槁葉驚寒雨
天際孤鴻答迴砧
敲枕便成魚鳥夢
豈知名路有機心

與啟明

越客逃名誤鑿坏
漢庭初聘碧鷄才
操心四十知無惑

削牘三千恥自媒
吟苦多年依洛社
賦成他日上蘭臺
郡齋縣榻流塵滿
七見東風落楚梅

此夕

此夕秋風獵敗荷
玉鈎斜影轉庭柯
鮫人淚有千珠迸
楚客愁添萬斛多
錦里琴心誰滌器
石城桃葉自橫波
程鄉酒薄難成醉
帶眼頻移奈瘦何

劉校理屬疾

北牕風勁雪雲繁
移疾端居避世喧
載酒誰過揚子宅

張羅休署翟公門多才最許飄飄氣小別還銷黯黯魂
促爾徘徊憶真賞遠天新月照黃昏

勸石集賢飲

日上三竿宿霧披章臺走馬帽簷敲祇傳祖席觴無算
肯顧尚書對有期芸省繙經終寂寞柳堤飛鞚好追隨
靈均不醉真何益千古離騷怨楚詞

燈夕上毓內翰

瓊樓十二玉梯斜乾鵲南飛轉斗車有客郢中歌白雪

幾人天上醉流霞
金吾緹騎章臺陌
素女繁弦大帝家
秦痔未痊齋閣掩
夢回宮樹已啼鴉

李舍人獨直

閣鳳巢高拂綵霓
玉芝香雜武都泥
十行漢札如絲出
六幕堯天倚杵低
露井冰銷垂素綆
仙莖日轉射璇題
赫蹠雲落知誰見
餘力何妨頌碧鷄

懷舊居

武夷仙穴近吾廬
鬪鴨欄摧菌閣虛
千匹歲儲妨種橘

百金春事廢觀漁北山烟霧迷歸轍南陌風塵化客裾
堂上金絲應已歇豈惟蘭菊舊叢疎

許洞歸吳中

春渚歸艎不暫留青絲如葆恐逢秋騷人已得江山助
賦客終成霰雪遊三逕未荒休歎鵬十漿先饋定驚鷗
洞庭霜橘畊田粟歲計猶堪比徹侯

館中

爐銷香篆霽餘芬宴坐攷瑜日易曛虎園微涼生夕籟

鶴天新霽見歸雲
通中夢穩春寒薄
肅唱聲沈夜漏分
誤濯塵纓成底事
崑阿千古有移文

苦熱

極目長天度鳥稀
纖羅不動轉晨暉
已裁圓月班姬扇
更換輕雲子產衣
河朔一時觴對舉
臨淄萬井汗交揮
冰丸雪散成虛設
欲借飈輪甃紫微

暑咏寄梅集賢

點綴鮮雲紫電寬
微風浙浙起霜紈
魏臺清暑開冰井

漢殿延年吸露盤
天外一飛期汗漫
水邊千畝憶檀欒
流波意密知音少
可得延陵為試觀

同友人話建溪舊居

聽話吾廬憶翠微
石層縣瀑濺嵒扉
風和林籟披襟入
月射溪光擊汰歸
露畹荒涼迷草帶
雨牆陰濕長苔衣
終年已結南枝戀
更羨高鴻避弋飛

憶山居

翹車藥佩謁明光
禁藥多年費稻梁
祇羨泥塗龜曳尾

翻嫌霧雨豹成章
鳴鳩春穀先疇廢
寒蝶秋菘老圃荒
歸計未成芳節晚
更憂禽鹿頓闕狂

櫻桃

離宮時薦罷樂府
艷歌新石髓凝
秦洞珠胎剖漢津
三桃聯並列百果
獨先春清蘂來
君賜雕盤助席珍
甘餘應受和圓極
豈能神楚客
便羊酪歸期負紫尊

螢

爽籟生遙浦
斜暉落半岑
微茫浮草際
零亂起牆陰
武

子牕塵積隋家苑樹深燈光透疎隙珠彩射清潯野燐
宵爭出星榆曉共沈長門秋漏永偏照淚潄潄

致齋太乙宮

漢帝祈年館威神法太微赤章修祕祝盤石拂仙衣雉
雝靈光發鸞歌彩霧霏霓旌飄夕吹瑤草泛春暉瓊屑
晨杯滿芝苗晝茹肥象尊猶一獻鳧舄自雙飛天濶颺
輪度宵殘素瑟希回看蔥鬱處佳氣接彤闈

譯經光梵大師

薪火滅雙林誰傳七佛心
譯筵香篆絕經葉蠹魚侵
猊座雲雷歇龍宮歲月深
青蓮流半偈白馬度千岑
大士招提啟明君羽葆臨
對翻天竺字助發海潮音
空界花成雨仁祠地布金
九旬談妙理三接簡宸襟
精舍延居士生臺集野禽
琅函香拂袂柰苑樹交陰
文字蹄求兔機緣芥引針
龍華他日會應記洛生吟

樞密王左丞宅新菊

中樞多暇日小圃占秋光
雕玉新成檻繁金乍泛觴
陶

籬侵柳色羅宅掩蘭芳芝影連虛室萱叢接後堂傅巖
猶借雨庾嶺未飛霜溫樹偏分蔭芸籤亦鬪香交枝迷
露井墜葉點橫塘桐錄知延壽千齡奉紫皇

秋夜對月

孤雲飛隴首顥氣滿區中警鶴仙盤外圓蟾浴殿東浦
寒珠有淚巖迴桂生風星彩沈榆莢霜華襲桂叢光搖
銀燭亂影射玉壺空露館迷秦甸冰臺接魏宮繞枝驚
暗鵲促雨思陰蛩更想離居恨回腸幾處同

前檻

遠信三年字空庭尺五天行雲愁夢徹初日妬妝妍織
為迴文亂髮非墮馬偏風車來未定月杵望長縣寶鑑
腸空斷銀潢眼欲穿層波自東注微意若為傳

荷花

絕岸疎烟合回塘夕照和水仙猶度曲川后自收波銀
漢橋橫鵲蘅皋襪濺羅玉杯承露重鈿扇起風多翠羽
芳洲近青絲快騎過石城秋信斷搔首奈愁何

舒女清泉滿黃姑別渚通巴天迷峽雨楚澤映江風思
逐鮫絲亂香愁翠被空灑從瓊藥露吹任石尤風怨淚
連疎竹私書託過鴻雙魚應共戲休問葉西東

別墅

別墅過從數當年意氣豪象筵開旭日金絡騁平皋託
乘爭飛蓋銜盃更藉糟麝烟凝藻祝繪縷落霜刀雞聳
花冠鬪猿驚柘彈號光風微轉蕙露井正開桃武子牛
探炙梁家兔刻毛東城歸路晚飛絮撲雲袍

夜讌

涼宵綺宴開
鄴醪湛芳壘
鶴蓋留飛鳥
珠喉怨落梅
薄雲齊鬢膩
流雪楚腰迴
巧笑傾城媚
雕章刻燭催
盤空珠有淚
壚冷蕙成灰
巾角彈碁勝
琴心促軫哀
醉羅驚夢枕
愁黛怯妝臺
風細傳疎漏
猶歌起夜來

宣曲二十二韻

宣曲更衣寵
高唐薦枕榮
十洲銀闕峻
三閣玉梯橫
鸞扇裁紈製
羊車插竹迎
南樓看馬舞
北埭聽鷄鳴
絲縷

知延壽靈符為辟兵粟眉長占額鬢髮俯侵晴蓮的沈
寒水芝房照畫楹麝臍薰翠被鹿爪試銀箏秦鳳何來
晚燕蘭夢未成絲囊晨露濕椒壁夜寒輕綺段餘霞散
瑤林密雪晴流風祕舞罷初日靚妝明雷響金車度梅
殘玉管清銀環添舊恨瓊樹怯新聲洛媛迷芝館星妃
滯斗城七絲絙綠綺六箸鬪紋枰慣聽端門漏愁聞上
苑鶯虛廊偏響屨近曙鎮嚴更剉葉心長苦投籤夢自
驚雲波誰託意壁月久含情海濶桃難熟天高桂旋生

銷魂壁臺路千古樂池平

受詔修書述懷感事三十韻

太極垂裳日中原偃革初樓船秋發詠衡石夜程書好
問虛前席徵賢走傳車蓬萊侷漢制煨燼訪秦餘紬繹
資金匱規模出玉除紛綸聞四部祕邃接千廬飲賜雙
雞膳親迴六尺輿華芝下閭闔白羽擁儲胥望氣成龍
虎披文辨魯魚清光無咫尺玄覽亦躊躇羣彥揮椽筆
微生濫石渠嵇康真懶慢謝客本空疎講學情田垌談

經腹筭虛月評依許劭文體慕相如雅飲歡娛洽清言
鄙恠祛彌旬容出沐終日喜羣居撫已慚鳴玉歸田憶
荷鋤池籠養魚鳥章服裹猿狙園府愁尸祿天閤愧敝
裾虛名同鄭璞散質數莊樗國士誰知我鄰家或侮予
放懷齊野馬屏息度羲舒寡婦空憂緯三公亦灌蔬危
心惟殼觫直道恐蘧蔭往聖容巢許先儒美寧蘧晨趨
歎勞止夕惕念歸歟秦痔踈孟酒顏瓢賴斗儲如諧曲
肱卧猶可直釣漁矯矯龜銜印翩翩隼畫旗一麾終遂

志阮籍去騎驢

到郡滿歲自遣

迢遞分符竹因循度歲華地將鯨海接路與鳳城賒觸
石雲頻起銜山日易斜潮平聚漁市木落見人家吏隱
偏知幸民謠豈敢誇無嫌勾漏僻且得養丹砂

郡齋西亭即事十韻招麗水殿丞武功從事

郡齋退食復何為縱目西亭景物奇壘嶂雨餘泉眼出
澄潭風靜釣絲垂城臨古戍寒蕪濶路轉荒村野竹危

幾處唱歌聞白紵誰家沽酒見青旗蝶隨遊妓穿花逕
犬吠行人隔槿籬桃李成蹊春盡後魚鹽為市日中時
桑麻萬頃晴氛散絲竹千門夕照移吟際嶺雲飛冉冉
望中壠麥秀離離烟迷喬木鶯遷蚤水滿方塘鷺下遲
鶴蓋翩然肯相顧主人終宴豈知疲

京師故人有以隴西鸚鵡遺余者因畜養之去年
出守縉雲提挈而至性靈甚慧觸類能言公退
翫之常若不足忽遇疾而逝因命瘞於小園作

詩一章聊以追悼識者無罪余以貴畜也

隴山秋樹舊巢傾
遠向江東逐旆旌
去國夢魂應繚繞
入春喉舌漸分明
一聲警露何慙鶴
百轉遷喬肯讓鶯
終日雕籠神不王
經年丹雘色猶輕
思歸悒悒因成疾
顧主依依尚有情
死葬小園芳草地
夜來經雨綠苔生

次韻和席衢州憶洛陽春遊十四韻

周漢經營跡未遐
山川形勝最堪嘉
前瞻闕塞千尋出
旁逗伊流一派斜
子晉鳳笙調夜月
宓妃羅襪映朝霞

何人貫酒青樓曉幾處尋春紫陌賒駿馬每從金埒試
芳叢多展翠帷遮出逢勝境爭飛蓋歸逼殘陽競走車
庭竹惹烟披嫩籜皋蘭裊露長新芽嵩峰嶒嶸疑摩斗
洛水清泠欲見沙萬井閭閻真陸海九重宮闕是天家
禁林日暖空啼鳥御苑風微自落花關路行人偏絡繹
津橋賈客苦諠譁何當獻賦論遷邑便欲拋官學種瓜
江海三年勞夢想田園二頃有生涯應知父老沾堯化
長挈壺漿望翠華

大理黃丞使潁州

祥刑新佐張廷尉出塞曾隨霍冠軍露版裁書頻倚馬
甘泉獻賦舊凌雲幾瞻龍袞堯階側暫駕星輶汝水濱
百萬提封周制復三千奏牘漢皇聞依蓮幕府遊從近
聚米山川向背分迴日受釐宣室對又應前席動吾君

戊申年七夕

五首

六幕西迴斗轉車鮮雲點綴玉鈎斜天孫已渡黃姑渚
阿母還來漢帝家

明河左界鵲南飛漢苑高樓正曝衣
一夕匆匆停弄杼
誰將錦石暫支機

蘭夜沈沈鵲漏移羽車雲幄有佳期
應將機上回文縷
分作人間乞巧絲

神女歡娛一夕休月娥孀獨已千秋
爭如靈匹年年會
莫恨牛津隔鳳輶

玉女壺傾笑電頻白榆晴影接星津
神光奕奕雲容薄
誰見凌波襪起塵

顏太初

彭城人顏子四十七代孫少博學有雋才慷慨好義善為詩多譏切時事登進士為莒縣尉忤轉運使落職用孔道輔薦召試中書言者擠之改臨晉主簿移應天府戶曹參軍南京國子監說書卒有集十卷

東州逸黨

天之有常度躔次絕乖離地之有常理沈潛無變虧人之有常道高下遵軌儀三才各定位萬古永不移二儀設有變修德可以祈人道或反常其亂何由支昔在典

午朝國祚方陵夷日向中夜出赫赫來東陸地向太極
裂中有蒼鵝飛高厚災且異人妖亦繁滋始有竹林民
怪誕名不羈次有夷甫輩高談慕無為沈湎多越禮阮
籍兼輔之虛名能飾詐光逸與王尼何曾有先見不能
救其衰張華徒竭力無以扶厥危至今西晉書讀之堪
涕洟邇來歷千年炎宋運重熙東州有逸黨尊大自相
推號曰方外友蕩然絕四維六籍被詆訶三皇遭毀訾
坑儒愚黔首快哉秦李斯與世立憲度迂哉魯先師流

蕩終忘反惡聞有民彝或為童牧飲垂髻以相嬉或作
概量歌無非市井辭或作薤露唱發聲令人悲或稱重
意氣金帛不為貨或曰外形骸頂踵了無私塵聚復獲
雜何者為尊卑遙聞風波民未見如調饑偶逢紳帶士
相對如拘縻不知二紀來此風肇自誰都緣極顯地多
用寧馨兒鄉老為品狀不以逸為嗤宗伯主計偕不以
逸為非家國盡為逸禮法從何施我常病其事中夜起
思惟平地三尺限空車發無歧重載歷百仞所來因陵

遲萬一染成俗雖悔何由追幸有名教黨可與決雄雌
所嗟九品賤不得立文墀賈誼唯慟哭梁鴻空五噫終
削南山竹冒死指其疵無使永嘉風敗亂昇平時

詠許希

鍼工許希下蔡人住梁門西市三十年及天聖中皇
躬達豫有內戚達其姓名上召見三進鍼而疾平面
授尚藥奉御其賜予不可勝紀謝恩畢西向而拜上
詢其故奏曰臣拜本師扁鵲也上惜其用心不忘本

給錢五十萬立祠封曰靈應侯因為詩以紀之

京城名利塗車馬交驅馳其間取富貴往往輸巫醫前
後十數輩身沒名已隳獨有許希者蘊蓄何瑰竒始自
下蔡來所處尤喧卑西市三十年汨汨無人知一朝仗
至藝驟登文石墀三鍼愈上疾神速不移時酬以六尚
官著籍通端闈旌以三品服佩紫垂金龜於時稱謝畢
西向復陳儀當宁驚且問歷歷宣其辭臣傳扁鵲術遇
主今得施特此一展謝臣心不自私主上惜其意擊賞

為噓唏仍給水衡錢國西命立祠復加靈應號金額照
華棖自此輦轂下求禱何祁祁我過慶成坊見之心且
悲秦醫術雖妙五腑及四肢所習得其人千齡祀不虧
魯聖術至大帝道與民彝所習非其人一朝反相持小
吏師荀况竊為辨說資作相勸焚書詐云愚蚩蚩後之
為儒者其心皆李斯昔在布衣日動守先王規朝談十
二經夕誦三百詩依憑稽古力榮進無他歧及居廟堂
上劍長冠莪巍自謂天所賦焉知有宣尼宣尼斷襲封

十經寒暑移他姓為邑官鄉老皆驚疑上章寢不報九重遭面欺諫官不舉失御史不言非盡為許希笑得路

忘先師

趙湘

字巨源華州人舉進士歷彰武永興昭武三軍節度推官遷著作佐郎知新繁縣以吏最擢知興元府入為殿中侍御史上書請封禪禮成命往昇州祠兼問民疾苦改刑部員外郎兼侍御史知雜事官至集賢院學士

寄楊埧

閉門苔自長春恨極天涯落日山橫水空城雨過花斷
狂曾避蝶多病更愁蛙江上無消息風吹渡柳斜

答徐本

天遠草離離秋霖寄信遲相思逢葉盡獨坐聽蟬悲岳
色寒前見松心雪後知頻招猶未至時復檢清辭

春夕偶作

一夕衡門獨自開雨陰深巷少塵埃酒醒風傍池邊起
坐久月從花上來何處夜歌初欲斷四鄰春夢未知回

因思此興無人共時復孤吟步綠苔

鮑當

真宗朝進士善為詩及第後為河南府法曹時薛
映知府事當失其意將欲罪之乃獻孤雁詩一首
映大嗟賞自是禮遇甚
優時人謂之鮑孤雁

松江夜泊

舟間人已息林際月微明一片清江水中涵萬古情

孤雁

寒多稻梁少萬里孤難進不惜充君庖為帶邊庭信

酬阮逸詩卷


木有毫端水有源
漸成盤錯到潺湲
右丞畫筆多平淺
平淺應知近自然

燕肅

字穆之益都人家曹州少孤貧遊學舉進士補鳳翔府觀察推官寇準知府事薦改著作佐郎知臨邛縣由通判河南府擢監察御史為丁謂所惡出知越州歷直昭文館至禮部侍郎卒喜為詩工畫入妙品

僻居

茅堂城市遠草徑接魚村白日偶無客青山長對門
藥爐留火暖花塢帶烟昏靜坐搜新句冥心傍酒樽



宋元詩會卷四